

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tũpa che poravo apóstol che reco ãgua ñehesa poropĩsirosa resendar mombehu ãgua.

² Tũpa niha yipĩsuiwe omombehu uca co ñehesa ava oñehe mombehusar upe icuachiapri maranehi pipe aracahe.

³ Ahe ñehesa Tũpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui;

⁴ ocuerayevise oespíritu maranehi pipe, ahese opĩratasa pipe omoyecua tupri ité Tũpa Rahir güecosa. Ahe niha yande Yar Jesucristo.

⁵ Ahe ichui Tũpa ombou cheu oporopĩtiviisa apóstol che reco ãgua, che cuai avei ava ndahei vahe judío upe Guahir recocuer mombehu ãgua opacatu ivi rupi sese yeroya uca ãgua 'ipipe sui toviroya che Rahir yuvireco' oya.

⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vahe. Pe niha Tũpa rembiaisu peico. Oipota avei pe reco catupri ãgua oyeupe nara. Peipisi catu porovasasa, teco tuprisa yande Ru Tũpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, “Aviye ndeu” ahe Tūpa upe pe rese. Esepia, opacatu ivi rupi icuapri sese pe yeroyasa.

⁹ Iyavei Tūpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico.

¹⁰ Aporanduño ité semimbotar rupi pe piri che so ãgua rese chupe yepi.

¹¹ Esepia, che aso pota ité Espíritu suindar mbahecuasa mondo pëu pe pítivii ãgua ‘toyemoviracua tupri catu Cristo rese yuvireco’ che yapave.

¹² Che aipota ité yande ñepeipei yañepítivii catu ãgua Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūritei rumo ndaicatuiño vité ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipãhuve” ahe pëu, inungar opacatu ambuae ivi rupi ãgüe ahe ava ndahei vahe judío upe vichico.

¹⁴ Che cuaita ité niha opacatu ava upe che ñehes ãgua, tecua pipendar yuvirecoi vahe upe iyavei ndayaracua vitéi vahe upe, imbahecua vahe upe, nimbahecuai vahe upe avei no.

¹⁵ Sese pe Roma ve peico vahe upe avei ayemonguerēhi voi eté co ñehesa pīsirosa resendar mombehu ãgua.

Ñehesa pīsirosa resendar pīratasa

¹⁶ Che nachī eté co ñehesa pīsirosa resendar aviye vahe sui. Esepia, ahe Tūpa pīratasa opacatu

viroyasar pĩsĩro ãgua, judío rane yĩpindar, ipare opacatu ambuae ava-ava tẽi avei.

17 Supi eté co ñehesa omboyecua Tũpa ava reco mbocatupriša. Oyese yande yeroyasa pipeño ité ěgũe ehi yandeu. Esepia, icuachiapri aracahendar aipo ehi: “Acoi ava seco catupri vahe Tũpa rese oyeroyasa pipe sui oicoveño itera apirẽhi” ehi.

Opacatu ava rembiavi resendar

18 Supi eté niha yande Aposar oñemoĩrosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upẽ yuvireco.

19 Ahe oicua tupri tẽi mbahe Tũpa suindar yuvireco. Esepia, Tũpa ité niha omboyecua chupe.

20 Ěgũe ehi eté Tũpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tũpa ité secoi iyavei ipĩratasa apirẽhi vahe. Sese ava angaipa viyar ndiyai, “Eñemosañõ tẽi rane oreu” ehi vaherã yuvireco chupe.

21 Esepia, yepe ahe oicua tẽi Tũpa yuvireco viña, nomboetei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ěgũe ehi tẽi vahe rese. Ipipe sui mbahe ndosenducua catu iri eté yuvireco.

22 Yepe, “Ore mbahecua vai” ehi tẽi viña, ndoicuai eté rumo mbahe ipipe yuvireco.

23 Esepia, ahe Tũpa nomanoi vahe seco porañete vahe mboetei rãgũer sui, omboetei ava ocañi tẽi

vaherã rahanga yuvireco iyavei vîrai, opacatu mbahe mîmba, mboi têi avei omboetei yuvireco.

²⁴ Sese Tûpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiêhisa pipe yuvireco.

²⁵ Esepia, mbahe supi vahe reroya rãgüer sui temira têi viroya catu yuvireco. Iyavei Tûpa ité mboyeroya rãgüer sui omboetei catu mbahe sembiapocuer têi yuvireco. Yaposar ité ru timboeteisa catu yepi.

²⁶ Sese Tûpa opoi eté ichui, “Toyapoño poromochisa mbahe têi güemimbotarai pipe yuvireco” ehi chupe. Evocoyase cuña avei cuimbahe rese güeco rãgüer sui yuvirecoi oyese ae.

²⁷ Cuimbahe avei cuña rese güeco rãgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tûpa supi eté vahe” ndehise seroyaêhisa pipe yuvireco, Tûpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe.

²⁹ Ahe evocoyase yuvirecoi opacatu mbahe-mbahe têi pipe; oyemboaguasa-guasa têi vahe cuimbahe, cuña avei, ambuae ava mbahe oipota rai iyavei oyapo mbahe-mbahe têi ava upe. Ahe oñemoïro ambuae ava mbahe pota raisave têi, oporapichi, ivava serai, iporombopa serai, ipihañemoñeta ava reco momara âgua têi iyavei imahechiroi ai ipipe yuvireco.

³⁰ Iyavei ambuae ava cupe cotive mara ehi-ehi têi vahe, ahe Tûpa amotarêhisar yuvirecoi, viroïro

avei ava, oyemboivate ai, oyeecomboivate ai tēi avei oñehe pipe yepi, oseca-seca tēi mbahe naporai vahe güembiaporã, nomboyeroyai avei oyesupa yuvireco,

³¹ ndoyapisaca potai eté Tũpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoipara:suerecoi eté ava yuvireco.

³² Oicua tēi Tũpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tũpa omondo ava upe sembiapogüer rupi tupri ité

¹ Oimese que pe pãhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei.

² Yaicua rumo Tũpa omocañise evocoi nungar mbahe tēi aposar recocuer, ahe evocoyase oyapo mbahe supi tupri vahe.

³ Pe opase ava recocuer pesenoi, pe avei rumo ãgüe peye tupri peico. Pe avei eté evocoyase ndapeñemi chietera Tũpa ñemoirosa sui.

⁴ ¿Peroĩro tie Tũpa oyapo vitesse mbahe aviye vahe oñemosase, seco mbegüe tupri ai vitesse avei pẽu? ‘Tosecuñaro güecocuer yuvireco’ oyapave rumo ãgüe ehi pẽu.

⁵ Pe rumo pepiharãta viteño ité Tũpa upe pe yevi potaẽhi ãgua. Sese pereco catu viteño ité Tũpa ñemoirosa peyese, acoi ari oyepotase Tũpa güeco

tuprisa pipe yande renoipara yande mocañi ãgua, anise yande pĩsĩro ãgua curi.

⁶ Ahese opara omboepi ñepei-pei yande rembiapogüer rupi yandeu.

⁷ Omboura tecovesa apirẽhi vahe yandeu yasecase teco ori, Tũpa suindar poromboeteisa iyavei mbahe apirẽhi vahe yande mbahe tupri aposa pipe.

⁸ Ombou aveira oñemoĩrosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tẽi.

⁹ Judío opacatu mbahe-mbahe tẽi aposar ranengatu oiporarara mbahe rasicuer yuvireco, iparera ndahei vahe avei judío.

¹⁰ Tũpa rumo opacatu seco catupri vahe upe omondora imboetei ãgua 'toipisi teco ori iyavei toyuvirecoi mbahe tupri pipe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tũpa ndayande mboyoaviratii yande rereco.

¹² Ëgüe ehi eté, opacatu oyemboangaipa vahe Moisés porocuita porẽhi oyemocañi tẽira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tẽi porandusave yuvireco coiye.

¹³ Esepia, osenduño tẽi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi.

¹⁴ Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe,

ahe evocoiyase inungar porocuita vireco vahe yuvireco.

¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose.

¹⁶ Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa pīsirosa resendar amombehu vahecuer rupi tupri ēgüe ehira curi.

Ñehesa judío resendar; Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose.

¹⁸ Peicua semimbotar. Ahe porocuita pe mbohe avei mbahe aviye catu vahe poravo āgua.

¹⁹ Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi.

²⁰ “Aicatu avei ava mbahe ndosenducuai vahe mboaracua iyavei ava chīhivahemi nungar mbohe āgua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité” peye tēi avei.

²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no?

22 Pe, “Ndiyai pe aguasa” peye; pe teieté avei rumo ãgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itũparó pipe sui.

23 Peyeecomboivate ai co mborocuaita rerecosa rese; ndapemboetei rumo Tũpa ipipe ahe mborocuaita mboaviyeẽhi pipe.

24 Supi eté icuachiapri aracahendar pipe aipo ehi: “Pe sui tẽi ava ndoicuai vahe Tũpa ñehe-ñehe tẽi serer maranehi rese yuvireco” ehi.

25 Supi eté co tecocuer cuacua circuncisión re-sendar ahe aviwere angara pẽu, peroya tupri itese Moisés porocuaita viña. Ndaperoya tupriise rumo, pe evocoyase inungar ndapeyembocircuncidai vahe peico.

26 Acoi ava ndoyembocircuncidai vahe, ahe rumo viroyase porocuaita, ahe seroyapri inungar imbocircuncidapri yuvirecoi.

27 Acoi ndoyembocircuncidai vahe, oyapose rumo mborocuaita yuvireco, ahe evocoyase omombehura pe cañi ãgua yuvireco. Esepia, yepe pereco Tũpa porocuaita viña, pe rumo ndapemboaviyei eté.

28 Judío supi eté vahe yaicose, ndahei yande yesupa judío recocuer rupi güeraño ãgüe yahera. Iyavei circuncisión supi eté vahe ndahei yande retocuer rese güeraño tẽi avei no.

29 Judío ete ité rumo opihá pipe ité viroya Tũpa. Iyavei circuncisión supi eté vahe, Espiritu rembiapo yande piha pipe, ndahei porocuaita icuachiapri rembiapo tẽi. Evocoyase judío supi eté vahe oipisira omboeteisa Tũpa suindar ité, ndahei ava

têi suindar.

3

¹ Evocoyase, ¿mbahe vo co aviye judío yande reco ãgua? ¿Yande yembocircuncidasa pïha aviyeera?

² Supi eté. Esepia, yipindar Tũpa omondo oñehe judío eta upe imboaviye ãgua.

³ Amove yepe ipãhu pendar nomboaviyeise ocuaita viña, ¿Tũpa avei tie êgüe ehira?

⁴ ¡Aní eté! Tũpa rumo supi tupri vahe ité secoi, yepe que ava opacatu semirañete ai tẽi yuvireco. Esepia, icuachiapri aracadendar pipe aipo ehi:

“ ‘Supi tupri vahe Tũpa’ ehira nde ñehe rese yuvireco.

Sese ereiquese ava porandusave, eresẽ tupriñora eso ichui” ehi.

⁵ Yande reco rai pipe tẽi yamboycuase Tũpa reco tupri, ¿mara yahera vo evocoyase? ¿“Tũpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tẽi viña.)

⁶ ¡Aní eté! Esepia, Tũpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

⁷ Aviyeteramo oimera ava aipo ehi vahe: “Yande remira pipe sui tẽi ava omboetei catuse Tũpa supi eté vahe, ¿mahera pïha evocoyase angaipa viyar nungar yande rerecora viña?” ehi.

⁸ “Yayapora ayase mbahe naporai vahe mbahe tupri reime ãgua” ehi. Amove ava, “Pablo on-dugüer reseve aipo ehi eté oporombohe” ehi tupri

tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepi angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepi angara viña!

¹³ Iñehesa mbahe tēi eté, inungar tuvipa ndasovapísai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñehe rai opihavĩracuá iteangasa pipe yuvireco.

¹⁵ Ndayipitii oporapichi ãgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri ãgua yuvireco.

¹⁸ Ndipihañemoñetai eté Tūpa sui osiquiye ãgua yuvireco” ehi.

19 Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tũpa ñemoirosa pisi ãgua yuvireco’ ohesave aipo ehi.

20 Esepia, ndipoi chietera que ñepeí seco aviye vahe Tũpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tũpa yande pĩsirora

21-22 Cũritei rumo Tũpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayandẽ mboyoavii eté. Yipive ité ahe imombehupri secoi porocuaita aracahendar pipe, iñehe mombehusareta rembicuachi-agüer pipe avei.

23 Supi eté yande opacatu yayapo angaipa, ndayasupitii eté Tũpa reco porañetesa.

24 Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe.

25-26 Tũpa rumo ombou Guahir Cristo oipiyere vaheã vuví yande angaipa rese ñero ãgua. Sese yande yeroya pipe oime ñeroisa yandeu. Ipipe omboyecua güeco ivi tuprisa. Yipisuiwe rumo güeco asiẽhisa pipe oñemosaño aracahendar ava angaipa

upe; cūritei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai ñgua sovaque! Esepia, ndahei porocuita mboaviye rese ñgüe ehi, ahe rumo Cristo rese yande yeroya pipe ñgüe ehi yandeu.

²⁸ Sese yaicua Tūpa, “Ereyavi mbahe che ñemoirosa pisi ñgua” ndehi iri Cristo rese yande yeroyase yandeu, ndahei mborocuita mboaviyesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño!

³⁰ ¡Supi eté ñpepiño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ñgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no!

³¹ Ndahei rumo, “Ñgüe ehi tēi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita ñgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pñha yande ramoi Abraham recocuer aracahe?

² Acoi mbahe güembiapo pipe sui tēi oipisise güeco tupri ñgua Tūpa sui, oyemboivate aira oico ipipe viña. Ndiyai eté rumo ñgüe ehi Tūpa rovaque.

³ Esepia, icuachiapri aracahendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi.

4 Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi.

5 Yande rumo, yayeroyase Tūpa rese, Tūpa evo-coiyase yande pisira, ‘co seco catupri vahe’ ohe-save. Esepia, ahe ěgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña.

6 David mborerecuar aracahendar avei oñehe ava rorivetsa rese Tūpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi.

7 Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

8 ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

9 Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese.

10 ¿Marase pñha oipisi oyeupe nara sereco? ¿Oyembocircuncida renondeve pñha, anise ipare tie? Yipive ité.

11 “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. ěgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. ěgüe ehi Tūpa, “Co seco catupri vahe yuvirecoi” ehi avei ahe ava upe.

12 Supi eté yande ramoi Abraham opacatu ava oyembocircuncida vahe, Tũpa rese oyeroya vahe yesupa avei seci. Abraham rumo oyeroya vahe Tũpa rese ndoyembocircuncida viteiseve.

Tũpa remimombehu imboaviyesara sese yeroyasa pipe

13 Esepia, aracahe Tũpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ěgũe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave.

14 Supi etese co mborocuita mboyeroysar gũeraño oipisise co mbahe oime vaheã chupe viña, evocoyase yande yeroyasa Tũpa rese ěgũe ehi tẽi etera, Tũpa remimombehugũer evocoyase ěgũe ehi tẽi vahe aveira viña no.

15 Esepia, co mborocuita mboaviyeẽhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaẽhisa.

16 Sese mbahe Tũpa remimombehugũer porerecosa yaipisira sese yande yeroyasa pipe, ahe semimombehugũer supi tupri vahe opacatu yande Abraham suindar upe nara. Esepia, ndahei mborocuita mboyeroysar upe gũeraño, ahe rumo opacatu yande Abraham nungar Tũpa rese oyeroya vahe upe nara. Evocoyase ahe opacatu yande ramoi seci.

17 Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tũpa niha Abraham rembieroya, ahe avei

omoiŋgove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité.

¹⁹ Abraham evocoyase ndasesarai eté oyeroya tupri sui, yepe vireco pota ité cien araviter viña. Iyavei oyoya güembireco reseve nañaroi eté guahi āgua yuvireco viña.

²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté.

²¹ “Supi eté Tūpa vireco opĩratasa opacatu oñehengagüer mboaviye āgua” ehiño ité opiha pipe.

²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño.

²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús.

²⁵ Esepia, ahe imondopri secoi yande angaipa repirã. Ipare Tūpa ombogüerayevi yande pisi āgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe.

² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayembovaha avei. Esepia, yaicua Tūpa piri yande reco āgua imborerecuasave.

³ Ndahei rumo sese güeraño yayembovaha, yande yemombaraisusa rese avei niha yayembovaha yaico. Esepia, yaicua ahe yande mbohe yande ñemosā āgua,

⁴ iyavei yañemosañose, yasē tuprira yande recoāhasa sui, ahese yaicua yaipisi vaheṛā mbahe aviye vahe Tūpa suindar yepi.

⁵ Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro āgua yande recocuera sui, Cristo rumo osupitise ari chupe, omano opacatu yande angaipa rese.

⁷ Aviyeteramo oimera que ñepe i ava omano vaheṛā ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirā” ehi vaheṛā chupe.

⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano āgua yande angaipa repirā.

⁹ Ipipe sui cūrtei, “Peyavi mbahe” ndehi iri chira. Sese nomboui chietera oñemoirosa yandeu.

¹⁰ Esepia, yamotarēhimbar yaico vitese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pisiro.

¹¹ Ndahei co reseño ēgüe yahera, yaviha catu

aveira Tũpa rese, yande Yar Jesucristo rese avei. Ichui niha ndipo iri mbahe Tũpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco.

¹³ Ndipo viteise Moisés porocuita, oime voi eté angaipa co ivi pipe. Yepe tie ndicuada vitei angaipa porocuita ndipoise viña,

¹⁴ Adán reco sui tupri ité rumo ava omanoño ité oangaipa pipe yuvireco. Ëgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeẽhisa resendar rese viña. Ahe Adán rese omboyecua mbia ou vaherã.

¹⁵ Tũpa porerrecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tũpa ombou oporerrecosa poropĩsirosa yandeu. Ahe rumo aviye catu vahe ava eta upe nara.

¹⁶ Ahe ñepeí ava angaipa rumo ndoyoyai eté Tũpa poropĩsirosa ombou vahe rese yandeu. Esepia, ñepeí ava angaipa sui ou Tũpa ñemoirosa; oporerrecosa rumo Tũpa ombouño ité ava eta mbahe oyavi ati vahe upe nara yangaipa mocañi ãgua.

¹⁷ Supi eté ñepeí ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tũpa porovasasa tuvichá vahe ité iyavei iporerrecosa, “Peyavi mbahe” iheẽhisa resendar. Sese yareco

ité tecovesa apirēhi vahe yandeyeupe nara ñepei ava sui, ahe Jesucristo.

¹⁸ Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya.

¹⁹ Esepia, ñepei ava Tūpa reroyaēhisa sui setá oime ava angaipa viyar; ēgüe ehi aveira ñepei ava mboyeroyasa sui setá aveira ava vireco güeco catupriša Tūpa rese yuvireco.

²⁰ Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui.

²¹ Evocoyase inungar angaipa ipīrata yandeu yande mano āgua viña, ēgüe ehi avei rumo Tūpa oporovasasa ipīrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pīha yayapo vīte angaipa yaico Tūpa yandeu oporovasasa mboyecua catu āgua?

² ¡Aní chietera! Esepia, yande niha senosepri angaipa sui. Evocoyase ndiya iri eté yayapo vīteño angaipa yaico.

³ ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese?

4 Yande ñeapiramose, aviye acoi ñotimbrí yaico Cristo rupive yande mbogüerayevi iri ãgua iyavei yande recocuer mopiasu ãgua avei, inungar acoi Cristo ocuerayevi Vu reco pĩratasa pipe.

5 Yande omano vahe nungar yaicose supive, ãgüe yahe aveira yande yacuerayevi supi.

6 Yaicua avei niha yipĩndar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tẽi nungar yande recoẽhi ãgua.

7 Esepia, acoi omano vahe ndoyapo iri angaipa yuvireco.

8 Yande avei niha omano vahe nungar Cristo rese yaico. Evocoyase yayeroya avei yaicove vaheã sese.

9 Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe.

10 Supi eté omanose Cristo, omano ñepei reseve opacatu angaipa mocañi ãgua; cũritei rumo oicove Tũpa upe nara.

11 ãgüe peye avei pe, “Che omano vahe nungar aico angaipa upe” peyera; “Che rumo Tũpa upeño ité aicovera yande Yar Jesucristo rese che recosa pipe” peye aveira.

12 Sese aní peico vite angaipa pĩratasavrive pe cuai ãgua pe remimbotarai mboyeroyasa pipe.

13 Aní peyemondo angaipa upe mbahe tẽi apo ãgua. Peyemondo catu Tũpa upe. Esepia, pe inungar ava ocuerayevi iri vahe peico. Sese peyemondo tupri ité Tũpa upe mbahe tupri apo ãgua.

14 Evocoyase, pe angaipa ndape cuai iri chira pe rereco. Esepia, ndapeicoi Moisés porocuaita pipe; pe rumo Tūpa porovasasa pipe peico.

Yembohesa mbiguai tēi recocuer sui

15 Ndayaico iri mborocuaita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera!

16 Pe niha peicua que ava pemboyeroyase, ipovri pendar evocoyase peico. Pemboyeroyase Caruguar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira.

17 Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe.

18 Ñepi reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico.

19 (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipindar pe retecuer pereco mbahe tēi pipe mbahe naporai vahe apo āgua. Ēgüe peye rumo pe cūrítei pe reco mohivi āgua peico mbahe tupri pipe ñepi reseve Tūpa upe pe reco āgua.

20 Pe peico vitesese mbiguai tēi nungar pe angaipa pipe, ahese ndapeyapo vitei mbahe supi tupri vahe;

21 cūrítei rumo pechĩ tēi ichui, ahe niha ndape pītivii eté pe recocuer rese, iyavei pe reraso pota manosa apirēhi vahesave yepi.

²² Cũritei rumo angaipa sui senosepri peico Tũpa povrive pe reco ãgua. Ichui mbahe tupri oime pũu. Ahe niha ombou oyeupe nara ité pe reco tupri ãgua. Ipipe sui peicora apirẽhi vaherã.

²³ Angaipa niha ombou manosa tẽi yandeu, Tũpa rumo oporerecosa ombou tecovesa apirẽhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitesese co ivi pipe.

² Esepia, inungar cuña omenda vahe, imer oicove vitesese, iporocuitavrive viteño ité secoi yepi. Omanose rumo imer ichui, ahe cuña ndahe iri omer porocuitavrive secoi.

³ Acoi cuña omer recove viteseseve, virecose ambuae cuimbahe, oyemboaguasa tẽi evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagũe iri; ahese ndahei yaguasa tẽi cute.

⁴ Che rivireta, pe niha ãgũe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico ãgua. Ahe niha acoi ocuerayevi vahe. Sese yande recocuer ãgũe ndehi tẽi vahe Tũpa upe.

⁵ Esepia, yande yaicove vitesese yande reco ai pipe, ahe porocuita renduse, yaipota catu mbahe tẽi pipe yande reco ãgua. Ipare rumo ahe manosave tẽi yande reraso ucara viña.

⁶ Cūritei rumo yande omano vahe nungar yaico acoi porocuaita pīpe yaico vahecuer sui. Ēgüe yahe, yasē ichui Tūpa upe mbahe apo āgua Espiritu sui yande reco piasu pīpe. Ndahe iri mborocuaita icuachiapri yipindar vahe pīpe yaico.

Angaipa oime vahe yande rese

⁷ ¿“Tūpa porocuaita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pīpe, ahese ndaicuai chiaveira che mbahe pota raisa viña.

⁸ Aicuase mborocuaita, ahese angaipa ipĩrata catu cheu. Ahe mborocuaita apo potaēhisa pīpe che querēhi catu opacatu che remimbotarai tēi apo āgua. Esepia, mborocuaita porēhi angaipa aviye ndipoi vahe viña.

⁹ Yipindar Tūpa porocuaita ndaicua viteise, ndoyavii aviye vahe ité che reco areco viña. Porocuaita aicuase rumo, aipota rai angaipa apo āgua.

¹⁰ Che evocoyase acañi tēi vaherã aico ipīpe viña. Ahe porocuaita che recove apirēhi āgua mbou rāgüer sui, che mondo ucaño itera manosa apirēhi vahe pīpe tēi viña.

¹¹ Esepia, angaipa ahe porocuaita pīpe che mbopa ité. Ahe ipīpe avei che mocañi tēira viña.

¹² Evocoyase co porocuaita ndaseco marai vahe ité, supi tupri vahe ité, aviye vahe avei.

¹³ ¿Co porocuaita aviye vahe pīha che rereco che mano āgua tēi? ¡Aní eté! Angaipa tēi rumo

ẽgũe ehi che rereco. Evocoyase co porocuaita cuasa sui oipota catu uca mbahe tẽi apo ãgua cheu. Ipipe aicua angaipa oime vahe che rese. Ẽgũe ehi avei ahe porocuaita omboyecua tupri ité angaipa mbahe tẽi vahe yandeu.

¹⁴ Yaicua niha porocuaita Tũpa suindar, che tẽi rumo imondopri aico angaipa mboyeroya ãgua.

¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarẽhi rumo ayapo.

¹⁶ Che rumo ayapose mbahe ndayapo potai vahe, ahese aicua co porocuaita aviye vahe.

¹⁷ Evocoyase ndahei cheyesui eté ẽgũe ahe, angaipa tẽi rumo ẽgũe ehi che mbohe uca.

¹⁸⁻¹⁹ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tẽi viña, che rumo ayapõno ité.

²⁰ Sese ayapo viteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tẽi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi.

²² Che piha pipe rumo Tũpa porocuaita aipotá iteanga tẽi,

²³ che rumo aicua che piha pipe oime ambuae mbahe, mbahe tupri apo potaẽhisar cheu, ahe angaipa tẽi oime vahe che rese. Ahe mbiguai nungar tẽi che rereco.

24 “¿Che paraísu ité!, ndaicatu iri eté, ¿uma pīha co mbahe tēi sui che renosera viña?” ahe cheyeupe vichico.

25 Tūpaño ité oicatu Guah̄r Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuaíta amboaviye pota viña, che remimbotarai tēi rumo che rereco uca angaipa povri ve.

8

Yaico vaheṛā Tūpa Espíritu rese

1 Cūritei rumo ndipo iri Tūpa ñemoirosa yandeu Jesucristo rese yaicose.

2 Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povri sui, manosa sui avei.

3 Esepia, yande remimbotarai rese ndayaicatui Moisés porocuaíta mboyeroya āgua, ahe avei evo-coiyase ndoicatui eté yande reco moingatu. Tūpa rumo oicatuño ité. Esepia, Guah̄r ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei.

4 Ahe ēgüe ehi yande yamboaviye vaheṛā mborocuaíta. Esepia, ndayaico iri yande remimbotar tēi pipe. Yaico rumo Espíritu aviye vahe rese.

5 Esepia, acoi yuvirecoi vahe rumo güemimbotar tēi pipe, güecocuerei reseño tēi ipihañemoñeta yuvireco; Espíritu rese yuvirecoi vahe rumo semimbotar rese ipihañemoñeta catu yuvireco.

6 Iyavei acoi güemimbotarai rese tēi ipihañemoñeta vahe, ahe omano itera apirēhi

yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco.

⁷ Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaíta mboyeroya āgua yuvireco.

⁸ Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar.

¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

¹¹ Acoi Tūpa Espiritu secoise pe rese, Tūpa evo-coiyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua.

¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaherā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi.

¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo

Tũpa rahır ité pe reco ãgua. Ahe avei, “¡Che Ru!” pe mbohe uca chupe.

¹⁶ Co Espíritu avei oicua uca yande espíritu upe Tũpa rahır yande recose.

¹⁷ Evocoyase yaipisi aveira mbahe yande Ru Tũpa ombou vaherã yandeu; ahe oyoya Cristo reseve yaipsisira, Cristo paraısu agüer pipe ité yaicose yareco vaherã teco porañetesa ipiri curi.

Teco porañetesa ou vaherã curi

¹⁸ Cũritei rumo yande paraısusa ndoyoyai eté teco porañetesa yande rese ou vaherã rese.

¹⁹ Opacatu Tũpa rembiapocuer osãro vite ité opacatu oquerẽhisa pipe, osepia pota ité teco porañete vahe tahır yuvirecoi vahe rese.

²⁰ Esepia, Tũpa rembiapo ndahe iri eté yipindar nimarai vahe nungar. Ndahei rumo oyesui tẽi ěgüe ehi, Tũpa ité, “Ěgüe tehi” ehi chupe, ombouse angaipa reprı ava upe. Mbahe sembiapocuer rumo osãroño ité

²¹ güeco opa tẽi vaherã sui ñepisiro ãgua teco porañete vahe Tũpa rahır vireco vahe rupiti ãgua curi.

²² Yande niha yaicua aracahe suive opacatu mbahe Tũpa rembiapo oiporara mbaherasıcier yuvireco cuña imembi rasi vahe nungar.

²³ Ndahei rumo ahe güeraño ěgüe ehi yuvireco, yande avei ěgüe yahe. Yande yareco ité Espíritu, ahe yipindar vahe yaipisi vaherã ichui curi. Yayemombaraisu, yasãro vite yande querẽhisa pipe Tũpa guahir ité yande rereco ãgua, yande retecuer recuñaro ãgua avei.

24 Esepia, yande niha yañepisiro ité yande remi-aro reroya pipe; sese acoi yasepia vahe mbahe yande remiario, nayasãro iri. Ndipoi ava osãro vite tēi vahe mbahe güembiepia.

25 Acoi mbahe yande remiario ndayasepia viteise rumo, yasãro vite yande ñemosasa pipe sereco.

26 Ëgüe ehi avei Espiritu yande p̄tivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe.

27 Iyavei Tūpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

28 Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime ãgua yande raisusave.

29 Esepia, yipive Tūpa yande cua, yande poravo Guahir Jesucristo nungar ité yande reco ãgua ‘ahe che Rahir tenonde catu vahe tasecoi opacatu ambuae che rahir sui’ oya.

30 Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco ãgua. Ipare, “Co seco catupri vahe” ehi chupe; ahe chupe avei omondo teco porañetesa.

31 ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

³² Tũpa niha ombou ité Guahĩr imano ãgua opacatu yande rese. Sese yaicua ombou aveira opacatu mbahe yandeu yande pĩtivĩi ãgua Tahĩr rese yande recose.

³³⁻³⁴ Sese ndiyai eté ava upe, “Pecañi tẽira, peyavi pe recocuer” ihe ãgua yande iporavopri yaico vahe upe yuvireco. Esepia, Tũpa opa omocañi yande angaipa yande sui Cristo omanose sepĩrã, iyavei ocuerayevise. Cũritei Cristo Vu acato coti, “Co cheundar ité yuvirecoi” ehi yande rese oyerure yepi.

³⁵ ¿Mbahe pĩha yande mboyepepĩra Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tẽisa, que tieporẽhi, anise que yande turucuarã ndipoise, que mbahe tẽise yandeu, yande yuca potase tie yuvireco?

³⁶ Inungar icuachiapri aracahendar pĩpe aipo ehi:

“Oyemoingatu voi arĩ rupi yande yuca ãgua yuvireco ndeundar yaicose, ovesa yucapĩrã nungar tẽi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopĩpa ité ahe yande raisusar recocuer pĩpe sui.

³⁸ Sese che aroya ité Tũpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepepĩi chiaveira ichui que Tũpa rembiguai, que seco ivate vahe, seco pĩrata vahe ndayasepiai vahe, que cũritei mbahe oime vahe yandeu, anise que mbahe oime vaheerã curi.

³⁹ ¡Ndayande mboyepepi chiaveira que iva pensar mbahe, anise que mbahe ivi pipendar, que ambuae mbahe Tũpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tũpa oiporavo Israel oyeupe nara aracahe

¹ Che Cristo reroyasar che reco pipe supi eté añehe, ndopombopai. Tũpa Espĩritu oicua ité che pĩhañemoñetasa supi vahe.

² Ndavihai eté che pĩha pipe; oime mbahe tasi vahe cheu yepi.

³ Che aipota tẽi opacatu che mu judío ñepĩsiro ãgua yuvireco viña. “Tacañi tẽi Cristo porẽhi icañi tẽiẽhi ãgua yuvireco” ahera viña.

⁴ Ahe niha Israel suindar yuvirecoi, aracahe Tũpa oiporavo vahe guahĩguã. Ahe ipãhuve avei seci güendigüer porañetesa pipe, iyavei omondo ité oñehe güemimbotar, oporocuaíta avei chupe nara viña ‘tache mboetei oyeruresa pipe che rõtave yuvireco’ oya, iyavei, “Amboaviye itera che ñehe pe rese” ehi yuvireco chupe.

⁵ Ahe avei niha yande ramoĩ yĩpĩndar vahe suindar yuvirecoi, Tũpa Rembiporavo Poropĩsirosar avei ahe ichuindar oyesu vahe. Ahe Poropĩsirosar niha Tũpa ité, ivate catu vahe seci opacatu sui. Sese, ¡timboeteisa catu yepi! ¡Ëgüe tehi apĩrẽhi!

⁶ “Tũpa nomboaviyei Israel upe oñehe imombe-hupri” ndapeyei chira. Esepia, ndahei opacatu Israel suindar supi tupri vahe.

⁷ Iyavei ndahei opacatu Abraham suindar tahir supí tuprí vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe.

⁸ Co rumo osenducua uca yandeu ndahei Abraham suindar yuvínose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi.

⁹ Esepia, Tūpa Abraham upe aipo ehi aracahe: “Co arí rupi avei ayevira curi, ahese oimera Sara membrí ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité.

¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membrí ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tuprii vahe” yahera? ¡Aní eté!

¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi.

¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu.

¹⁷ Supi eté Tūpa aipo ehi mborerecuar guasu

Egipto pendar upe aracahe: “Che oromoingue uca mborerecuar nde reco ãgua che pĩratasa mboyecua ãgua nde sui, che rer mboetei ãgua avei opacatu ava upe co ivi pĩpe” ehi.

¹⁸ Ëgüe ehi oporoparaisuereco güemimbotar rupi. Güemimbotar rupi avei omboavai viroya ãgua ava upe.

¹⁹ Aviyeteramo oimera que amove pe pãhu pendar aipo ehi vahe, “Ndiyai evocoyase Tũpa upe, ‘Pe peyavi mbahe’ he ãgua yandeu. Esepia, ndipoi eté niha ava, ‘¡Aní!’ ehi vaherã Tũpa remimbotar upe” ehira.

²⁰ “Ndiyai eté rumo Tũpa poepi ãgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe ãgua oaposar upe.

²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviyecatu vahe apo, oicatu avei ambuae iporupirã tẽi apo ãgua.

²² Tũpa rumo oñemosa pare iya ité oñemoirora, opĩratasa mboyecua ãgua ocañi tẽi vaherã upe.

²³ Ëgüe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique ãgua.

²⁴ Yande avei yande renoi oyeupe, que judío, anise que ndahei vahe judío yande recose.

²⁵ Esepia, Oseas rembicuachiagüer pĩpe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

26 “ ‘Pe ndahei vahe cheundar peico’ ehi vahe-save, ahe chupe, “Tũpa oicove vahe rahir ité’ hesara” ehi.

27 Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tẽi rumo oñepisirora yuvireco.

28 Esepia, yande Yar omboaviye voira oñehe ava viroyasarẽhi mocañi ãgua co ivi pipe” ehi.

29 Oyoya avei ambuae Isaías remimombehuguer yipindar vahe rese:

“Yande Yar seco pĩrata catu vahe noipĩsirose que moviro yande ramoi yandeu, yacañipa tẽira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pĩsirosa re-sendar

30 ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pipe rumo vireco ité güeco catupriisa Tũpa rovaque.

31 Judío yuvirecoi vahe rumo oipota tẽi güeco tupri ãgua ité Tũpa porocuita mboyeroya pipe viña, ndoicatui eté rumo supiti yuvireco.

32 Esepia niha, ndahei oyeroyasa pipe ité osecá oñepisiro ãgua, ahe rumo co mborocuita mboyeroysa sui tẽi Tũpa rese yuvirecoi pota viña. Ahe evocoyase ndoyavii oyepiapi vahe “ita yepiapis” rese yuvireco.

33 Aipo ehi tupri icuachiapri arachendar pipe:

“Che amondo Sión ve ñepeí ita yepiápisá, ahe oporoetí vahe.

Acoi sese oyeroyá vahe rumo, nomochi ucai chiterá oyésui” ehi Jesús recocuer upe.

10

¹ Che rívíreta, che aipota che piha pipe ité iyavei ayerure Tũpa upe che mu judío recocuer rese ‘toñepisiro yuvireco’ che yapave.

² Supi eté iquerẽhi ité Tũpa upe mboraviqui apo ãgua yuvireco viña. Oquerẽhisa sui rumo oyavi senducuaẽhisa pipe yuvireco.

³ Esepia, ndoicua potai mara ehi Tũpa ava pisi oyeupe. Sese oyésui tẽi oseca güecocuer tuprisa pipe ‘tomoingatu Tũpa opiha yande pisi ãgua’ ohesave yuvireco viña. Ipipe sui nomboyeroyai eté Tũpa remimbotar güeco mbocatupri ãgua ité yuvireco.

⁴ Esepia, Cristo recocuer pipe imboaviyesa tupri Moisés porocuita, “Peyavi mbahe che ñemoirosa pisi ãgua” ehiẽhi ãgua Tũpa oyese oyeroya vahe upe.

⁵ Co yande reco catupri ãgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi.

⁶ Tũpa, “Peyavi mbahe che ñemoirosa pisi ãgua” heẽhi ãgua rumo yande yeroyasa pipe, “Ava vo oyeupira ivave Tũpa Rembiporavo reroyi ãgua” ndapeyei chira.

⁷ Iyavei, “Ava vo ogüeyira omano vahe pãhuve Tũpa Rembiporavo mboyeupi uca ãgua” ndapeyei chiveira.

⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera.

⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora.

¹⁰ Esepia, yande piha pipe yayeroya Jesús rese. Ahese Tũpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.

¹¹ Esepia, icuachiapri aracahendar pipe Tũpa aipo ehi: “Acoi sese oyeroyá vahe rumo, nomochi ucai chietera oyesui” ehi.

¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe.

¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi.

¹⁴ Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe.

¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe pĩsirosa resendar!” ehi.

¹⁶ Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo

ehi avei aracahe: “Che Yar, ¿uma pñha viroya ore ñehe yuviereco?” ehi.

¹⁷ Sese yayeroya Jesucristo rese co ñehesa pñsirosa rendusa pñpe.

¹⁸ ¿Osendu pñha judío co ñehesa yuviereco? ¡Osendu ité! Esepia, aipo ehi avei acoi icuachiapñi araca-hendar pñpe:

“Sendusa niha opacatú ivi rupi ñehe” ehi.

¹⁹ Iyavei, ¿osenducua pñha yuviereco? ¡Osenducuaño ité! Esepia, yipñdar Moisés omombehu icuachi-apñi pñpe aipo ehi:

“Perecatñhira che porovasasa rese oipñise ava ndahei vahe judío iyavei peñemoñra aya-
pose mbahe aviye vahe acoi ava, nda-
yaracuai vahe upe” ehi.

²⁰ Ipare omombehu tupñi ité Isaías osiquiyeñhisave Tñpa ñehe aipo ehi vahe:

“Acoi ava ndache recai vahe, ahe che pñsi ité yuviereco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi ñehe tñi ava che reroyasarñhi ndiporeroyai vahe upe vichico” ehi aracahe.

11

*Moviroya tñi ava Israel pñdar Tñpa oiporavo oye-
upe nara*

¹ Evocoiyase, ¿omombo pñha Tñpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramo eté, Benjamín suindar avei aico.

² Yipisuive ité niha Tūpa, “Co ava cheundar ité” ehi ore ramoi israelita upe. Sese cūrítei ndore momboi eté oyesui. Peicua niha acoi Elías re-sendar icuachiapri aracahendar oyerogui tēise omu israelita rese aipo ehise Tūpa upe:

³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi.

⁴ Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi.

⁵ Ēgüe ehi avei cūrítei opita viteño moviro judío, ahe niha Tūpa oiporavo oporoaisusa pipe.

⁶ Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoiyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua.

⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūrítei ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi.

⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipípe sui toyuvíroha mbahe tēi pípe yuvíreco, toyemombaraisu uca avei ipípe yuvíreco.

¹⁰ Toicua eme mbahe inungar ndasesapísoi vahe yuvíreco.

Icuhapapri nungar ayase toyuvírecoi apírēhi va-herā” ehi.

Ndahei vahe judío ñepísiro agüer

¹¹ Evocoyase areco iri che porandusa pēu: ¿Apírēhi vaheherā ité pīha judío eta ndoyeroyai Jesucristo rese oñepísiro āgua yuvíreco? ¡Aní eté! Ahe rumo ēgüe ehi ava ndahei vahe judío pīsirosa písi āgua yuvíreco. Ipípe sui oyemonguerēhi catura judío ipísi āgua yuvíreco curi.

¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvíreco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi.

¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar písi āgua oyeupe nara yuvíreco.

¹⁵ Esepia, judío mombosa pípe sui Tūpa omoime ñerosa opacatu ava co ivi pípendar upe. ¿Mara ehira pīha evocoyase Tūpa ipísise? Ahese oipísira tecovesa apírēhi vahe yuvíreco, evocoyase ndoyuvíreco iri chira omano vahe nungar Tūpa upe.

¹⁶ Esepia, yipindar panguã sui yapopri seropovēhese Tūpa upe, opacatu panvi evocoyase

sovasapri avei ichui. Iyavei inungar ivira rapo seropovêhese Tũpa upe viña, sãca avei evocoyase opacatu êgüe ehí aveira viña.

17 Amove che mu judío inungar Olivo rãca yasiapri. Pe evocoyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vîracuasa pe recove ãgua.

18 Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

19 Iyavei, “Co judío rumo imombosa ité ivira rãca asiapri nungar yande sendagüerve yapita vaheã” peye revo.

20 Supi eté, co rumo Tũpa reroyaêhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe.

21 Esepia, Tũpa oiporavo co judío oyeupe nara ité viña, ndoviroyaise rumo, ndoipisi eté. Pẽu avei êgüe ehira ndapemboyeroyaise.

22 Peyapisaca tupri, Tũpa niha aviye vahe ité. Seco pîrata vahe avei rumo ava viroyaêhisar upe. Pẽu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tẽi peicora.

23 Opoipase rumo judío eta Cristo reroyaêhisa sui, Tũpa evocoyase viroyevi irira oyeupe nara. Esepia, chupe iya ité ipisi iri ãgua.

24 Pe ndahei vahe judío ivıra caha pipendar rãca yasiapri nungar peico, Tũpa rumo pe mondo ivıra aviye vahe nungar rese. ¡Evocoyase judío ete ité inungar ahe ivıra aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

25 Che rivireta, che aipota, “Toicua Tũpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tũpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu,

26 ahese ramo opacatu ava judío yuvirecoi vahe Tũpa oipisirora. Esepia, icuachiapri aracahendar pipe aipo ehi:

“Oura ava Pĩsrosar judío recua Sión pāhu sui, ahe oipehara mbahe naporai vahe opacatu judío sui.

27 Evocoi niha che remimbotar chupe nara, amocañise yangaipagüer yuvireco ichui” ehi.

28 Ēgüe ehi cūritei judío eta ndosendu potai ñehesa pĩsirosa resendar yuvireco. Sese Tũpa amotarēhisar yuvirecoi. Pēu mbahe tupri āgua rumo ēgüe ehi. Tũpa rumo osaisu vite. Esepia, yipive ité oiporavo tamoi eta oyeupe.

29 Supi eté, Tũpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui.

30 Yipindar niha pe ndapemboyeroyai eté Tũpa. Cūritei rumo judío eta ndoviroyaise yuvireco, pe paraisuereco Tũpa.

³¹ Ëgüe ehi avei judío eta cūritei ndoviroyai yuvireco. Tūpa pe paraisuereco uca ãgua rumo ãgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco.

³² Esepia, Tūpa ité, “Opacatú oyaví mbahe che reroyaẽhisa pìpe” ehi ‘oicuase mbahe güembiaví, ti-querẽhi opacatú che poroparaisuerecosa pìsi ãgua yuvireco’ oya.

³³ ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tuprì ãgua. Ndayaicatui avei secocuer cuapa tuprì ãgua.

³⁴ Ndipoi eté que ava oicua vahe yande Yar pìhañemoñetasa iyavei ndipoi eté que ambuae ava tẽi ombohe vahe no.

³⁵ Ndipoi que ava mbahe omondo vahe yande Yar upe ‘tomboyeví cheu’ ohesave.

³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opĩratasa pìpe. ¿Sese imboeteiprì ité Tūpa tasecoi yepi! Ëgüe tehi apirẽhi.

12

Yande recocuer imondoprì Tūpa upe nara

¹ Sese che rivireta, che Tūpa poroparaisuerecosa pìpe aipota pe yemondo ité pe recovesave chupe nara, inungar mbahe Tūpa upe seropovẽheprì ité, ahe avíye itera chupe. Ahe niha pe cuaita pe pìha pìpe sui eté peyapo vaherã chupe.

² Peico iri eme co iví pìpendar pìhañemoñetasa tẽi rupi. Iyacatu rumo pesecuñaro pe pìhañemoñetasa. Ipìpe sui opacatu pe recocuer oñecuñarora. Ëgüe

peyese, peicuara Tūpa remimbotar ahe mbahe aviye vahe, semimbotar supri tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe.

⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo.

⁵ Ēgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepe-pe opacatu upendar yaico.

⁶ Tūpa niha omboyeavirati mbahecuasa imbou oporoaisusa pipe ñepe-pe upe. Evocoyase Tūpa ombouse oñehe mombehu āgua yandeu, yamombehura ñepe-pe iñehe sese yande yeroyagüer rupi.

⁷ Que ombouse mbahecuasa ambuae ava pñitivii āgua yandeu, yaipñitivii tupri aveira. Ombouse yande porombohe āgua, yaporombohe tupriño itera.

⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropñitivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pñitivisar, toipñitiviiño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe.

¹⁰ Peyeaistu catu ñepei-pei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva péndar rārosa pipe; peñemosañño mbahe rasicuer peiporarse iyavei aní chira peseya pe yeruresa yepi.

¹³ Peipitivi ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyembovīha acoi ava oyembovīha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepei-pei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave.

¹⁸ Peicatu vahe rupi peseca pe reco tupri āgua opacatu ava upe.

¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyañño Tūpa upe. Ahe oicudara chupe. Esepia, icuachiapri pipe

aipo ehi: “Che ité aicuara ava mbahe tēi aposar upe. Che amboepira” ehi yande Yar.

²⁰ Iyavei aipo ehi: “Acoi nde amotarēhimbar ndasiēpoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochira pe sui” ehi.

²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité.

² Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira.

³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu.

⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco.

⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande

píhañemoñetasa momaraēhi āgua rese avei.

⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evo-coiyase aheño ité iporaviquisa yuvireco.

⁷ Yamondo ñepeí-peí ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroy-apri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita.

⁹ Aipo ehi acoi Tūpa porocuita: “Ndapeyem-boaguasai chira, ndapeporoyucái chira, ndape-mondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi.

¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñhengagüer yipindar seroyasa sui.

¹² Supi eté osupiti senimi ari yandeu; sese iya-catu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoyase tayaico sundao oyoepisa omonde vahe nungar.

13 Yande catu yaguata yande reco ñvi tupriisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no.

14 Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo ãgua yande remimbotarai pipe.

14

Aní peroñro ambuae Jesús reroyasar

1 Acoi ava ndoyeroya tupri vitei vahe yande Yar rese que oiquese pe piri, peipisi tupriira; aní peiñhepoepira ipihañemoñetasa ndahoyoyaise pe pihañemoñeta rese.

2 Esepia, amove evocoi nungar ava ihupri pãve tēi yuvirohu, oime rumo amove ava ipihañemoñeta opacatu mbahe hu ãgua rese.

3 Acoi ava opacatu mbahe ohu vahe, toviroñro eme amove ndohui vahe mbahe iyavei acoi amove ndohui vahe mbahe, toviroñro eme acoi ohu vahe opacatu mbahe. Esepia, evocoi nungar ava Tũpa oipisi ité.

4 Supi eté pe ndiyai eté peroñro vaherã ambuae ava rembiguai. Esepia, ahe yande Yar povri pen-dar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opĩratasa pipe osecomoingatuño itera.

⁵ Oime avei amove ava ñepeí arí omboetei catu yuvireco ambuae arí sui, iyavei ambuae oime aipo ehi: “Oyoya guasuño ité niha arí” ehi vahe. Ñepeí-pei opíhañemoñeta rupi, “Co supí tuprí vahe” ehira opíha pípe yuvireco.

⁶ Acoi que ñepeí arí ava omboetei vahe, yande Yar mboeteisa pípe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Avíye ndeu” ehi Tūpa upe; iyavei acoi amove ndohui vahe mbahe, Yar mboeteisave ãgüe ehi, iyavei, “Avíye ndeu” ehi avei Tūpa upe.

⁷ Esepia, yande ñepeí-pei ndayaicoi yandeyeupe nara tēi, ndayamanoi avei yandeyeupe nara.

⁸ Esepia, yaicove vıtese, yaico yande Yar upe nara; yamanose, yamano yande Yar upe nara avei. ãgüe yahe yande yaicove vıtese, anise yamanose, opacatu chupe nara ité yaico.

⁹ Sese niha Cristo omano, ipare ocuerayevı opacatu ava Yar güeco ãgua que omano vahe, anise que oicove vıte vahe upe avei.

¹⁰ ¿Mahera evocoyase peroĩro pe mboetasa Cristo reroyasar iyavei mahera ndapesepia potai? Esepia, supí eté niha yande opacatú yasora Tūpa rovai. Ahe evocoyase opara oporandu yande recocuer rese yandeu.

¹¹ Esepia, icuachiaprí aracahendar pípe omombehu:

“Supí eté che reco pípe aipo ahe, ehi yande Yar, opacatu ava oñenopíhara che rovai yuvireco, iyavei che mboeteira yuvireco, ehi” ehi.

12 Evocoyase yande ñepeí-peí yamombehura yande recocuer Tũpa upe.

Aní pe rĩvireta mbahe tẽi pĩpe pereco uca

13 Sese yande ndiyai yañeroiro. Iyacatu rumo ñepeí reseve pereco tuprĩ ambuae pe rĩvrĩ, angaipa pĩpe sereco ucaẽhi ãgua, iyeroyasa momaraẽhi ãgua avei.

14 Che yande Yar reroyasar che reco pĩpe aicua ndipoi eté que tembihu yande reco momara vahe. Amove rumo ava, “Mbahe tẽi co tembihu, ndiyai yahu” ehise, ahe chupe evocoyase mbahe tẽi, ndiyai eté ihu ãgua.

15 Iyavei yande que mbahe yahuse, ipĩpe yamomara tẽise yande rĩvrĩ pihañemoñetasa Tũpa rese, ndahei evocoyase yande poroaisusa pĩpe ité ãgũe yahe. ¡Aní ahe yamocañi tẽi uca Cristo sui evocoi nungar mbahe yahu vahesa pĩpe! Esepia, secocuer rese Cristo omano.

16 Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe tẽiẽhi ãgua.

17 Esepia, ndahei ivate catu vahe Tũpa upe yande carusa, yande igua avei ipovrive yande recose. ãgũe ehi rumo co ivate catu vahe chupe yande recocuer mohivisa, yande reco tuprĩsa ambuae Tũpa reroyasar pãhuve iyavei yande roriveta yareco vahe Espĩritu Santo sui.

18 ãgũe yahese Cristo mboeteisave, aviyey aira Tũpa upe iyavei opacatu ava rembiepiave avei no.

19 Sese opacatu yande recoeté pĩpe yasecara yaico tuprĩ vaheerã yandeyeupe. Ipĩpe sui yande

yaicatura yañepitivii yande yemoviracua tupri ãgua yande Yar rese.

²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara ãgua.

²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriēhi ãgua.

²² Yande pihañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñetasa pipe!

²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitesse que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha.

² Iyacatu rumo opacatu yande yambovihara ava yande cotindar, yayapo aveira mbahe aviye vahe

seco aviye ãgua yuvireco chupe ‘toyeroya catu opihañemoñeta pipe Tũpa rese yuvireco’ yande yapave.

³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi.

⁴ Supi eté co opacatu omombehu vahe aracahe opa icuachiasa yande mbohe ãgua, yande yasãro vaheřã Tũpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar.

⁵ Tũpa, acoi ombou vahe yande ñemosasa, yande pihamonguerēhisa avei yandeu, tape pĩtivii oyoya guasu pe reco tupri ãgua ñepeipei peyese Jesucristo recocuer rupi.

⁶ Ipípe sui pe opacatu oyoya guasu ñepeipei pe pihanemoñetasa pipe, pe ñehe pipe avei tapemboetei Tũpa, yande Yar Jesucristo Ru.

Ñehesa pĩsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pisi tupri oyeupe nara Vu mboetei ãgua.

⁸ Che rumo aipo ahe pēu: Jesucristo ou judío pĩtivii Tũpa remimombehugüer mboaviye ãgua judío ramoi aracahendar upe. Ēgüe ehi Tũpa oñehe mboaviyesa mboyecua

⁹ ‘tomboetei ava ndahei vahe judío yuvirecoi vahe che Ru Tũpa iporoparisuerecosa rese yuvireco’ oyapave. Ahe Ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pãhu rupi, iyavei asapucaira ndeu nde rer mboeteisa pipe” ehi.

10 Iyavei acoi ambuae icuachiapri pipe omombehu avei no:

“¡Peyembovîha catu pe opacatu ndahei vahe judío peico vahe judío Tũpa rembiporavo reseve!” ehi.

11 Ambuae pipe avei aipo ehi no:

“Pe opacatu ivi pipendar ava, ipemboetei yande Yar!” ehi.

12 Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvireco” ehi.

13 Tũpa acoi ombou vahe mbahe oyesuindar rãro ãgua, tayande mbovîharete catu iyavei mbahe tupri tayareco sese yeroyasa pipe. Ipipe sui tombou yasãro vaherã ahe mbahe aviye vahe Espíritu Santo pĩratasa pipe.

14 Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepei-pei peyeupe pe yemboaracua ãgua.

15 Co tecocuer rese rumo aicuachía opacatu che siquiyeẽhisa pipe pẽu pe resaraiẽhi ãgua ichui. Esepia, ayapo Tũpa che cuaita ombou vahe che raisusa pipe cheu

16 Jesucristo rese che poraviqui ãgua ava ndahei vahe judío recocuer aviye ãgua. Evocoyase judío pahi nungar che cuaisa pipe amombehu co ñehesa Tũpa ombou vahe pĩsirosa resendar

yuvireco chupe imoporēhi āgua Tūpa rovai inungar mbahe seropovēhepri aviye vahe Tūpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tūpa che cuaita rese.

¹⁸ Esepia, cheu ndiyai añehe vaherã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherã. Esepia, amonguerēhi Tūpa reroya āgua yuvireco che ñehe rese, che rembiapo sui avei.

¹⁹ Ēgüe ahe poromondiisa mbahe yavai vahe apo Tūpa pīratasa pipe. Ahe ayapo Espiritu Tūpa suindar pīratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

²⁰ Chequerēhi avei co ñehesa pĩsirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi,

²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicutui aso pe piri, yepe setá rupi aso pota tēi viña.

²³ Cūritei rumo opa amboaviye che poraviqui co ivi rupi, iyavei opa tēi setá araviter pe piri che sosa rāgüer.

²⁴ España ve che soseve, apita pucumira vicho pe piri yande yembovîha ãgua. Iyavei pe sui che sê potase, che pîtivîmîra peye aheve che so ãgua.

²⁵ Cûritei rumo che asora Jerusalén ve. Arasora porerecosâ ahe pendar yande mboetasa Jesús reroyasar pîtivîi ãgua.

²⁶ Esepia, ivî Macedonia pendar iyavei Acaya pendar Jesús reroyasar, ahe omonuha guarepochi yuvîreco Jerusalén ve yande rivîi iparaisu vahe pîtivîi ãgua yuvîreco.

²⁷ Ahe êgüe ehi gûemimbotar rupi yuvîreco iyavei iya ité imbojevî ãgua yuvîreco chupe ahe mbahe tupri oyeupe apo agüer rese. Esepia, yîpîndar Jesús reroyasar judío yuvîrecoi vahe oicua uca co tecocuer Tûpa suindar ahe ava ndahei vahe judío yuvîrecoi vahe upe. Sese iya ité imbojevî ãgua co ivî pîpendar porerecosâ chupe.

²⁸ Opase che co porerecosâ amondo yuvîreco chupe, España ve che sose, ahese apitara vicho pe piri.

²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivîreta, yande Yar Jesucristo rer pîpe iyavei yeaisusa Espîritu ombou vahe pîpe avei aporandu pëu opacatu che rese peyeroqui pîrata vaheerã Tûpa upe che pîtivîi ãgua co mboravîqui rese.

³¹ Peporandu Tûpa upe, tache repî ava Jesús reroyasarêhi sui ivî Judea ve, iyavei Jerusalén pendar yande rivîreta co porerecosâ pîsi tupri ãgua avei.

³² Ahese Tûpa oipotase, che avîharetera ayepotase pe repîa, iyavei toime pîtuhusa yandeu

che pe piri che sose.

³³ Ëgüe tehi Tüpa güeco tuprisa pipe tasecoi opacatu pe rese.

16

Pablo mahenduhasa ñepe-pe-ava upe

¹ Co yande reindri Febe serer vahe, ahe oipitivi tecua Cencrea pendar Cristo reroyasar oico.

² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipitiviño que mbahe chupe ipane vahe rese. Esepia, ahe setá ité oporopitivi iyavei che avei eté che pitivi no.

³ Pemombehu che mahenduha Prisca upe, Aquila upe avei, ahe niha che pitivi mboraviqui Jesucristo recocuer resendar rese yuvireco.

⁴ Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe.

⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar.

⁶ Pemombehu avei che mahenduha María upe. Ahe niha oporaviquí iteanga vahe pe recocuer rese.

⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol

remimboyero ya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe.

⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei.

¹⁰ Pemombehu avei che mahenduha Apeles upe. Ahe niha güecoãhasa sui osẽ tupri vahe Cristo rese oyeroyasa pipe. Iyavei pemombehu che mahenduha ava Aristóbulo rēta pipendar yuvirecoi vahe upe avei.

¹¹ Pemombehu avei che mahenduha che mu Herodiõn upe, ava Narciso rēta pipendar yande Yar reroyasar upe avei.

¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara.

¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei.

¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe

che mahenduha mombehuse peyeupe. Opacatu Cristo reroyasar cohave omondo avei omahenduhasa yuvireco pẽu.

¹⁷ Che rivireta, peicua catu pe pãhu pendar omboyaho pota serai vahe sui. Oime ava ãgũe ehi vahe, oiti uca vahe ava mbahe tẽi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepẽiño itera.

¹⁸ Esepia, ahe ava ndahei yande Yar Jesucristo upe nara oyapo mbahe yuvireco. ãgũe ehi rumo ahe oyeupe nara tẽi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tẽi yuvireco.

¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe tẽi apo ãgua.

²⁰ Evocoyase Tũpa gũeco tupriisa pipe pihaiivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pẽu. Ahe che pĩtivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pẽu, che avei che mahenduhasa amondo yande Yar reroyasa pipe pẽu.

²³ Omondo avei omahenduhasa Gayo pẽu. Ahe sètave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pẽu, ahe

tecua mbahe guarepochi apocatusar. Yande rívrí Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoëhi suive mbahe ndicuasai vahe rese.

²⁶ Cũritei rumo oyecua uca oñehe mombehusar rembicuachía pipe Tũpa apirëhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, ëgüe tehi ahe yande Yar Jesucristo rer pipe imboeteipri tasecoi!

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739